

Pengetua perlu penuhi matlamat Falsafah Pendidikan Kebangsaan - Raja Perlis

UM/27 04 17/35/1/D/PERLIS

ARAU 26 April- Raja Perlis, Tuanku Syed Sirajuddin Putra Jamalullail bertitah, pengetua sekolah perlu memenuhi matlamat Falsafah Pendidikan Kebangsaan bagi menjadikan negara pusat kecemerlangan pendidikan.

Baginda bertitah, kejayaan matlamat tersebut terletak pada keupayaan golongan pendidik menguasai perkembangan teknologi maklumat sebelum Malaysia mampu mengeksport ilmu.

“Matlamat ini boleh dicapai dengan iltizam, wawasan serta sasaran yang jelas berpaksi pada integriti yang unggul berlandaskan etika dan piagam pelanggan, sistem dan proses kerja serta pematuhan amalan pendidikan

terbaik,” titah baginda dalam majlis Perasmian Persidangan Kebangsaan Pengurusan Pendidikan Pengetua Sekolah Malaysia Ke-56 di Dewan Ilmu Universiti Malaysia Peris (Unimap), di sini malam tadi.

Teks ucapan dibacakan oleh Raja Muda Perlis, Tuanku Syed Faizuddin Putra Jamalullail yang mewakili baginda.

Yang turut hadir Menteri Besar, Datuk Seri Azlan Man.

Baginda bertitah, kepemimpinan ialah amanah dan tanggungjawab, bukan keistimewaan dan hanya layak dipegang oleh golongan yang memiliki ciri-ciri pemimpin luar biasa seperti mempunyai kekuatan intelektual dan ketajaman daya analisis untuk

membina wawasan. Selain itu, titah baginda, pemimpin harus memiliki kemahiran dan pengetahuan yang melampaui asas profesioan pengurusan khususnya kecekapan mentadbir dengan bijaksana.

Tuanku Syed Sirajuddin bertitah, pengetua sekolah hendaklah sentiasa mematuhi kod etika dan piagam pelanggan sehingga menjadi budaya dalam pekerjaan mereka selain kepentingan awam diberikan keutamaan.

Kira-kira 500 pengetua dari 2,401 Sekolah Menengah seluruh negara menyertai persidangan itu yang bertemakan ‘Kepimpinan Berkualiti Memacu Gelombang Kedua PPPM’ yang bermula Isnin lalu dan berakhir esok. - BERNAMA



TUANKU SYED FAIZUDDIN PUTRA JAMALULLAIL merasmikan Persidangan Kebangsaan Pengurusan Pendidikan Pengetua Sekolah Malaysia Ke-56 sambil diperhatikan Azlan Man (tiga dari kiri) di Arau, Perlis, malam semalam. - BERNAMA